

cyBerita: Lelaman Internet Berita Harian Singapura.

Ekoniaga

Walau berhak, para waris juga perlu miliki ihsan

WALAUPUN mempunyai hak dari segi hukum faraid, ahli waris harus juga mempunyai rasa ihsan jika mereka merasakan harta pusaka yang akan mereka terima itu akan mendatangkan kesusahan kepada orang lain.

Kes itu juga memberikan pengajaran kepada ibu bapa yang masih hidup dan mempunyai anak angkat untuk membuat wasiat, nuzriah atau hibah ruqba semasa mereka hidup agar sebahagian harta mereka itu diberikan kepada anak-anak angkat setelah mereka meninggal dunia.

Mengulas mengenai kes Cik Latifah (bukan nama sebenar) itu, Ustaz Firdaus Yahya berkata adik-beradik Encik Ahmad (bukan nama sebenar) yang menuntut harta abangnya itu memang mempunyai hak dari segi hukum untuk mendapatkan harta itu.

'Mereka memang mempunyai hak tetapi pada masa yang sama, mereka harus menerapkan sifat-sifat keihsanan.

'Jika orang yang dicintai si mati itu lebih memerlukan, mereka boleh melepaskan sedikit hak mereka. Harta pusaka ini merupakan harta mendatang. Janganlah kita ambil kesempatan daripada kesusahan orang lain,' jelas Ustaz Firdaus, yang telah membentuk sebuah firma, Syariah Consultancy Education & Training, bagi memberikan nasihat mengenai pengagihan harta pusaka.

Malah, harta mendatang yang diperolehi itu datang dengan tanggungjawab, tegas beliau.

Walaupun anak-anak angkat Encik Ahmad tidak mendapat sesen pun dari harta pusaka bapa mereka, adik-beradik Encik Ahmad yang mendapat harta pusaka itu harus menjaga anak-anak angkat itu dengan baik jika mereka belum berdikari.

'Dari perspektif agama, adik-beradik Encik Ahmad itu juga bertanggungjawab menjaga anak-anak angkat itu dengan baik,' katanya.

Dari segi hukum Syariah, anak angkat tidak mendapat harta pusaka ibu bapa angkat mereka.

Jadi, ibu bapa angkat itu, jika ingin anak-anak angkat mereka mendapat harta pusaka mereka setelah mereka meninggal dunia, harus membuat perancangan kewangan dari awal.

'Tbu bapa angkat boleh membuatkan wasiat untuk memberikan satu pertiga daripada harta pusakanya kepada anak angkat. Mereka juga boleh membuat hibah atau nuzriah,' jelas Ustaz Firdaus.